

# INUIT ATAQATIGIIT

## Inatsisartuni

18. august 2023



UKA2023/46

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Filmiliortarneq pillugu Inatsisartut inatsisissaannik Naalakkersuisut saqqummiussinissamik peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq.**

(Inatsisartunut Ilaasortaq Peter Olsen, Inuit Ataqatigiit)

### Tunggavilersuut:

Nunatsinni tanngassimaarutissatta nuannaarutissattalu ilaat tassaavoq nunatsinni eqqumiitsuliortortatta akornanni amerlialuttuinnarlutillu pikkorissigaluttuinnarnerat. Assersuutigiinnarlugu Nuummi filmiortortarfiup 2019-ikkunnili pilersinneratigut filmiortarneq soqutineqaleraluttuinnarsimavoq filmiortartullu amerliartuaarusaalersimallutik.

Filmiliortarneq silarsuaani nunatsinni filmiortartut amerlapput, taakkua nunarput sinnerlugu filmiortartut nunarsuup sinneranut appakaakkiartuaalersimapput, nunarpullu sinnerlugu takutitsilluartalereerput.

Filmiliortarneq nunatsinneersut, nunaqqatittalu nammineq suliarisarsimasaat ilaatigut makku eqqaaneqarsinnaapput; KNI-sen 1995/1996, Tikeq Qiterleq Mikileraq 2008, Nuummioq 2009, Qaqqat Alannguat 2011, Sume 2014, Akornanniittut – Tarratta Nunaanni 2017, Anori 2018. Ilaannanngui saqqummiuppakka, naak suli nutaanik aamma amerlanerungaartunik saqqummertoqartalereeraluortoq.

Ukiunilu kingullerni filmiortarneq silarsuaani sukkasuupilorujussuarmik ineriartortoqarpoq allaat Nunatsinni filmiortarneq iluani inatsimmik pilersitsisoqarnissaa pisariaqartinneqalersimalluni.

Tamannalumi aamma uppersarnerarlunilu ersersinneqarpoq upernaq manna 2023-mi inatsisartut ataatsimiinneranni Naalakkersuisuninngaanniit saqqummiunneqartumi uani; "[Kalaallit Nunaanni filmiortarneq qanoq ilillugu pitsanngorsarneqarsinnaaneranut siunnersuut](#)"<sup>1</sup>-ni. Nassuiaatitut aamma taaneqarsinnaasumi.

Nassuiaammi tassani siunnersuuterpassuarnik soqutiginarpassuarnik ulikkaarpoq. Nassuiaammilu tassani ilaatigut oqariartuutiginartoq tassaavoq filmiortarneq pillugu inatsimmik pilersitsisoqartariaqarnera.

Inatsisip taassuma iluani filminik suliaqarneq aamma filminik siammarterisarneq pillugit aaliangersakkanik imaqsinnaasoq aammalu filmiortarnermut inatsit allamiunut tungatillugu nunatsinni filminik suliaqassagaluarunik, suliaqarnissamat tunggavissamik aaliangersakkamik peqarnissaannik inatsisissami inassuteqaateqartoqarsinnaasoq nassuiaammi oqariartuutiginartoqarsimalluni.

---

<sup>1</sup> [pkt75\\_fm22\\_redegoerelse-til-fm-2023-anbefalinger-til-hvordan-filmproduktion-kan-styr-kes\\_kal.pdf \(ina.gl\)](#)

Minnerunngitsumillu filmiortarnermut tunngatillugu ilisimatusarfimmut, tassa qallunaatut Film Institut-  
mik taaneqarsinnaasumik pilersinneqarumaarsinnaasumut aammalu isumalioqatigiissitamut  
pilersinneqarsinnaasumut aalajangersakkamik inatsissaq una pineqartoq imaqartinneqarsinnaalluni.

Nunatsinni, nunarsuullu sinnerani filmiortarnerup iluani ineriartorneq taama sukkatigitillugu  
malinnaaniassagutta, kinguleruppallaassanngikkuttalu, isumaqarpunga suleqatigiissitap inassuteqaatai  
tusaanngitsuusaarneqarsinnaanngitsut. Imaappoq nunatsinni filmiortarnerup tungaatigut  
inatsiseqalernissatsinnut piffissanngorsorinarpoq.

Taamattumik matumanga siunnersuut saqqummiuppara, neriullunga tigulluarneqarumaartoq.

**Pisortanut aningaasatigut allaffissornikkullu kingunerisassai:**

Inatsimmik suliaqarnissaq allaffissornikkut ingerlatsinermi AC-mik ilinniarsimasup nalinganik, tassalu  
ukiumut 500.000 kr.-nik naleqarumaartoq naatsorsuutigineqarpoq.

**Namminersortunut aningaasaatigut allaffissornikkullu kingunerisassai:**

Soqanngilaq.

**Innuttaasunut aningaasatigut allaffissornikkullu kingunerisassai:**

Soqanngilaq